

■ CONVIVENZA

Moda privlusa

DA VIOLA PFEIFFER*

Moda po esser bler. Moda po esser moderna, schicca, retro, in, out, faira, nunecologica, ristgada, sexy, lungurusa, chara, bunmartgada e mintgatant perfin primitiva. Ma dacurt hai jau stuì chattar ora che moda po anc esser insatge auter, numnadamain privlusa. Ma avant che tuts spetgan uss in artitgel davart il privel da sa vestgir memia sexy en il temp dad oz stoss jau dir ch'il privel ch'jau maneigel è tut in auter che quel che tscherta gliued vesa en hotpants, minis e tops che mussan l'umbli.

Il privel è numnadamain bler pli real ed era bler pli brachial. Ma jau cumenz meglier a l'entschatta: Jau hai in'amia che sa vestgescha adina vaira hip, ma era fitg lescher. Ella ha gugent chaussas cumadaihlas e per cletg è la moda actualmain era pulit lucca, en il vair senn dal pled. Chautschas luccas èn total en il trend. Culottes, chautschas da Marlene, chautschas da palazzo. Tut total in. E gist las davosas purtava mia amia avant trais emnas, cumbinà cun in pèr sandalas da Birkenstock ch'han il mument in revival total e ch'èn natiralmain er absolutamain cumadaihlas.

Quella cumbinaziun è però sa revelada sco



stics, mabain per motivs da segirezza. Igl è numnadamain capità il suandant: In bel suentermezdi l'avust chamina mia amia da la staziun a chasa. Ella na curra betg, ella n'è betg sturna e betg vi dal telefonin. Ella sa legra simplamain da vegnir a chasa. Ma tuttenina sa chavistrescha la bordura da las palazzos tranter sia detta-pe e las Birkenstocks. Ella stgarpitscha e dat cun la schanuglia direct sin il funs da catram.

Las palazzos èn futsch, la schanuglia er. Plajas da la grondezza d'ina palmaun sin omadus schanugls èn la consequenza. Ella avess probablamain stuì ir a laschar cuser la plaja, sch'igl avess anc gi pel per cuser. Duas emnas pli tard n'èn las plajas anc adina betg sa serradas dal tut. Tala vestgadira duess ins munir cun in'admoniziun: «Adatg, ina tala cumbinaziun po chaschunar schanuglia sfratgada!»

Esch'ins è gist vidlonder: I dat anc outra vestgadira ch'avess basegn da talas admoniziuns. A la testa: flip-flops. Betg mo ch'ins ha cun quests «chalzers» la grazia d'in ippopotam sin LSD. Els fan er ina ramur terribla. Sco sch'ins avess montà duas mieurs mez mortas sut ils pes. Ma il pir: Flip-flops èn probablamain er ils emprims chaschunaders da blessuras da stgarpitschar – suenter stgalims irregulars e malgulativezzas dal funs. Gliez hai jau gia emprendi daditg. Per esser pli exact: Avant 16 onns sin la Rickenstrasse ad Uznach tranter la chasa da scola e l'orticultura Fleischlin, gist davant la chasa da mes charin da scola.

Basta. I resta pia da dir ch'i dovra per tscherta vestgadira in pau curaschi, betg perquai ch'ella è spezialmain ristgada u sexy, mabain perquai ch'ella è propi privlusa per corp e vita. Jau vegn a tegnair endament quai cura che jau vom questa saira en sortida. Jau hai numnadamain era da quellas chautschas ed er in pèr Birkenstocks. Ma lezs cumbinesch jau oz pli gugent cun in sexy mini. Quai è bain era ristgà, ma almain betg per mia schanuglia.

*** Viola Pfeiffer ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.**